

佛經四十二章

迦葉摩騰 共竺法蘭 譯



佛經四十二章

底本：麗藏

序	6
① 出家證果	7
② 斷欲絕求	8
③ 割愛取足	8
④ 善惡並明	8
⑤ 改過滅罪	9

⑥	忍惡無瞋	9
⑦	惡還本身	9
⑧	害賢滅己	10
⑨	守志會道	10
⑩	隨喜獲福	11
⑪	舉田較勝	11
⑫	尊親顯孝	12
⑬	舉難勸修	12
⑭	問道宿命	13
⑮	行善志大	13

①⑥	忍力心明	13
①⑦	澄濁見道	14
①⑧	明來暗謝	15
①⑨	念行會道	15
②⑩	觀覺得道	15
②①	推我本空	16
②②	名聲喪本	16
②③	財色招苦	16
②④	妻子甚獄	16
②⑤	色欲障道	17

②6	貪欲損道	17
②7	無著得道	18
②8	疏意遠色	18
②9	正觀待色	18
③0	趣道避欲	19
③1	心寂欲除	19
③2	愛離怖滅	20
③3	堅心得道	20
③4	處中證道	21
③5	垢淨明存	22

③6	展轉顯勝	22
③7	知命了道	23
③8	念戒近道	24
③9	教海無差	24
④0	盡惡圓覺	24
④1	出欲免苦	25
④2	達世知幻	25

南無本師釋迦牟尼佛

自歸於佛 當願眾生 紹隆佛種 發無上意

自歸於法 當願眾生 深入經藏 智慧如海

自歸於僧 當願眾生 統理大眾 一切無礙

佛經四十二章

序

昔，漢孝明皇帝，夜夢見神人，身體有金色，項有日光，飛在殿前。意中欣然，甚悅之。明日問群臣：此為何神也？

有通人傅毅曰：臣聞「天竺有得道者，號曰佛，輕舉能飛。」殆將其神也。

於是上悟，即遣使者張騫、羽林中郎將秦景博士弟子王遵等十二人，至大月

支國寫取佛經四十二章。在第十四石函中登，起立塔寺。於是道法流布，處處修立佛寺。遠人伏化願為臣妾者，不可稱數。國內清寧，含識之類蒙恩受賴，于今不絕也。

① 出家證果

佛言：辭親出家為道，名曰沙門。

常行二百五十戒，為四真道行，進止清淨，成阿羅漢。

阿羅漢者，能飛行變化，住壽命，動天地。

次為阿那含。阿那含者，壽終魂靈上十九天，於彼得阿羅漢。

次為斯陀含。斯陀含者，一上一還，即得阿羅漢。

次為須陀洹。須陀洹者，七死七生，便得阿羅漢。

② 斷欲絕求

愛欲斷者，譬如四肢斷，不復用之。

③ 割愛取足

佛言：除鬚髮，為沙門，受道法。

去世資財，乞求取足，日中一食，樹下一宿，慎不再矣！

使人愚弊者，愛與欲也。

④ 善惡並明

佛言：眾生以十事為善，亦以十事為惡。身三、口四、意三。

身三者：殺、盜、淫。

口四者：兩舌、惡罵、妄言、綺語。

意三者：嫉、恚、癡。不信三尊，以邪為真。

優婆塞行五事，不懈退。至十事，必得道也。

⑤ 改過滅罪

佛言：人有眾過，而不自悔頓止其心。罪來歸身，猶水歸海，自成深廣矣。

有惡知非，改過得善，罪日消滅，後會得道也。

⑥ 忍惡無瞋

佛言：人愚吾，以為不善。吾以四等慈護濟之。重以惡來者，吾重以善往。

福德之氣，常在此也。害氣重殃，反在于彼。

⑦ 惡還本身

有人聞「佛道守大仁慈，以惡來，以善往。」故來罵。

佛默然不答，愍之癡冥，狂愚使然。

罵止。

問曰：子以禮從人。其人不納，實禮如之乎？

曰：持歸。

今子罵我，我亦不納，子自持歸，禍子身矣！

猶響應聲，影之追形，終無免離，慎為惡也。

⑧ 害賢滅己

佛言：惡人害賢者，猶仰天而唾。唾不污天，還污己身。

逆風坩人。塵不污彼，還坩于身。賢者不可毀，禍必滅己也。

⑨ 守志會道

佛言：夫人為道，務博愛。博哀施，德莫大施。守志奉道，其福甚大。

⑩ 隨喜獲福

覩人施道，助之歡喜，亦得福報。

質曰：彼福不當減乎？

佛言：猶若炬火。數千百人，各以炬來，取其火去，熟食除冥，彼火如故。

福亦如之。

⑪ 舉田較勝

佛言：飯凡人百，不如飯一善人。

飯善人千，不如飯持五戒者一人。

飯持五戒者萬人，不如飯一須陀洹。

飯須陀洹百萬，不如飯一斯陀含。

飯斯陀含千萬，不如飯一阿那含。

飯阿那含一億，不如飯一阿羅漢。

飯阿羅漢十億，不如飯辟支佛一人。

飯辟支佛百億，不如以三尊之教，度其一世二親。

教親千億，不如飯一佛。學願求佛，欲濟眾生也。

飯善人，福最深重。

⑫ 尊親顯孝

凡人事天地鬼神，不如孝其親矣。二親最神也。

⑬ 舉難勸修

佛言：天下有五難：①貧窮，布施難。②豪貴，學道難。③制命，不死難。

④得覩佛經難。⑤生值佛世難。

⑭ 問道宿命

有沙門問佛：以何緣得道？奈何知宿命？

佛言：道無形，知之無益，要當守志行。譬如磨鏡，垢去明存，即自見形。

斷欲守空，即見道真，知宿命矣。

⑮ 行善志大

佛言：何者為善？唯行道善。何者最大？志與道合大。

⑯ 忍力心明

何者多力？忍辱最健。忍者無怨，必為人尊。

何者最明？心垢除、惡行滅，內清淨無瑕。

未有天地，逮于今日，十方所有，未見之萌，得無不知、無不見、無不聞。

得一切智，可謂明乎！

⑰ 澄濁見道

佛言：人懷愛欲，不見道。譬如濁水，以五彩投其中，致力攪之，眾人共臨水上，無能覩其影者。

愛欲交錯，心中為濁，故不見道。水澄穢除，清淨無垢，即自見形。

猛火著釜下，中水踊躍，以布覆上，眾生照臨，亦無覩其影者。心中本有三毒涌沸在內，五蓋覆外，終不見道。

要心垢盡，乃知魂靈所從來，生死所趣向。諸佛國土，道德所在耳。

⑱ 明來暗謝

佛言：夫為道者，譬如持炬火入冥室中。其冥即滅，而明猶在。學道見諦，愚癡都滅，得無不見。

⑲ 念行會道

佛言：吾何念？念道。吾何行？行道。吾何言？言道。吾念諦道，不忘須臾也。

⑳ 觀覺得道

佛言：觀天地，念非常。觀山川，念非常。觀萬物形體豐熾，念非常。執心如此，得道疾矣。

佛言：一日行，常念道、行道，遂得信根，其福無量。

②1 推我本空

佛言：孰自念身中四大，名自有。名都為無，吾我者寄生。生亦不久，其事如幻耳。

②2 名聲喪本

佛言：人隨情欲求華名。譬如燒香，眾人聞其香。然，香以熏自燒。愚者貪流俗之名譽，不守道真。華名危己之禍，其悔在後時。

②3 財色招苦

佛言：財色之於人，譬如小兒貪刀刃之蜜，甜不足一食之美。然，有截舌之患也。

②4 妻子甚獄

佛言：人繫於妻子、寶宅之患，甚於牢獄、桎梏、銀鐺。牢獄，有原赦。妻子情欲，雖有虎口之禍已，猶甘心投焉，其罪無赦。

②5 色欲障道

佛言：愛欲，莫甚於色。色之為欲，其大無外，賴有一矣。假其二，普天之民，無能為道者。

②6 貪欲損道

佛言：愛欲之於人，猶執炬火，逆風而行。愚者不釋炬，必有燒手之患。貪婬、恚怒、愚癡之毒，處在人身，不早以道除斯禍者，必有危殃。猶愚貪執炬，自燒其手也。

天神獻玉女於佛，欲以試佛意、觀佛道。

佛言：革囊眾穢，爾來何為？以可斯俗，難動六通。去！吾不用爾。

天神踰敬佛，因問道意。佛為解釋，即得須陀洹。

②7 無著得道

佛言：夫為道者，猶木在水，尋流而行。不左觸岸，亦不右觸岸，不為人所取，不為鬼神所遮，不為洄流所住，亦不腐敗，吾保其入海矣。

人為道，不為情欲所惑，不為眾邪所誑，精進無疑，吾保其得道矣。

②8 疏意遠色

佛告沙門：慎無信汝意，汝意終不可信。慎無與色會。與色會，即禍生。得阿羅漢道，乃可信汝意耳。

②9 正觀待色

佛告諸沙門：慎無視女人。若見無視，慎無與言。若與言者，敕心正行。

曰：吾為沙門，處于濁世，當如蓮花，不為泥所污。老者以為母，長者以為姊，少者為妹，幼者如女，敬之以禮。

意殊當諦惟觀，自頭至足，自視內彼身何有，唯盛惡露諸不淨種，以釋其意矣。

③⑩ 趣道避欲

佛言：人為道，去情欲，當如草見火，火來已却。道人見愛欲，必當遠之。

③⑪ 心寂欲除

佛言：人有患姪，情不止，踞斧刃上，以自除其陰。

佛謂之曰：若使斷陰，不如斷心。心為功曹，若止功曹，從者都息。邪心不

止，斷陰何益？斯須即死。

佛言：世俗倒見，如斯癡人。

有姪童女與彼男誓。至期不來，而自悔曰：

欲吾知爾本 意以思想生 吾不思想爾 即爾而不生

佛行道聞之，謂沙門曰：記之！此迦葉佛偈，流在俗間。

③② 愛離怖滅

佛言：人從愛欲生憂，從憂生畏。無愛即無憂，不憂即無畏。

③③ 堅心得道

佛言：人為道，譬如一人，與萬人戰。被鉀、操兵、出門欲戰。意怯膽弱，乃自退走。或半道還，或格鬥而死。或得大勝，還國高遷。夫人能牢持其心，

精銳進行，不惑于流俗狂愚之言者，欲滅惡盡，必得道矣。

③④ 處中證道

有沙門，夜誦經，甚悲。意有悔疑，欲生思歸。

佛呼沙門。問之：汝處于家，將何修為？

對曰：恒彈琴。

佛言：絃緩，何如？

曰：不鳴矣。

絃急，何如？

曰：聲絕矣。

急緩得中，何如？

曰：諸音普調。

佛告沙門：學道猶然。執心調適，道可得矣。

③⑤ 垢淨明存

佛言：夫人為道，猶所鍛鐵漸深。棄去垢，成器必好。

學道以漸深，去心垢，精進就道。

暴即身疲，身疲即意惱，意惱即行退，行退即修罪。

佛言：人為道亦苦，不為道亦苦。惟人自生至老，自老至病，自病至死，其苦無量。心惱積罪，生死不息，其苦難說。

③⑥ 展轉顯勝

佛言：夫，人離三惡道，得為人難。既得為人，去女即男難。既得為男，六

情完具難。六情已具，生中國難。既處中國，值奉佛道難。既奉佛道，值有道之君難。既值有道之君，生菩薩家難。既生菩薩家，以心信三尊、值佛世難。

③⑦ 知命了道

佛問諸沙門：人命在幾間？

對曰：在數日間。

佛言：子未能為道。

復問一沙門：人命在幾間？

對曰：在飯食間。

佛言：子未能為道。

復問一沙門：人命在幾間？

對曰：呼吸之間。

佛言：善哉！子可謂為道者矣。

③⑧ 念戒近道

佛言：弟子去離吾數千里，意念吾戒，必得道。若在吾側，意在邪，終不得道。其實在行。近而不行，何益萬分耶！

③⑨ 教海無差

佛言：人為道，猶若食蜜，中邊皆甜。吾經亦爾，其義皆快，行者得道矣。

④⑩ 盡惡圓覺

佛言：人為道，能拔愛欲之根。譬如摘懸珠，一一摘之，會有盡時。惡盡，得道也。

④1 出欲免苦

佛言：諸沙門行道，當如牛負，行深泥中。疲極，不敢左右顧，趣欲離泥，以自蘇息。沙門視情欲，甚於彼泥。直心念道，可免眾苦。

④2 達世知幻

佛言：吾視諸侯之位如過客，視金玉之寶如礫石，視氎素之好如弊帛。

佛經四十二章

無上妙法喜見聞 讀誦修持為他說 福慧增長災障除 咸共眾生成佛道

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道



妙法寺 香港新界屯門藍地 <https://www.mfbm.hk>